

- उप मुख्यमंत्री अर वित्त मंत्री दिया कुमारी काल विधानसभा मांय राज्य रो माली साल 2024-25 रो पूरो बजट पेश करेला।
- प्रधानमंत्री नरेन्द्र मोदी मॉस्को मांय भारत रा लोगां ने सम्बोधित कीना-कह्यो-सरकार रो लक्ष्य भारत ने दुनिया री तीजी मोटी माली व्यवस्था बणावणो है।
- राष्ट्रपति द्रौपदी मुर्मू विद्यार्थियां ऊं इंसानियत अर देश रा भला सारु ज्ञान रो इस्तेमाल करण बाबत् कह्यो।
- मौसम विभाग आज अर काल प्रदेश रा लंकाऊ ऊगणी हलका मांय कठे-कठे भारी बारिश रा आसार जताया।

000

उप मुख्यमंत्री अर वित्त मंत्री दिया कुमारी काल संवारे 11 बज्यां विधानसभा मांय राज्य रो माली साल 2024-25 रो पूरो बजट पेश करेला। वित्त मंत्री वित्त विभाग रा अतिरिक्त मुख्य सचिव अखिल अरोड़ा समेत न्यारा-न्यारा अहलकारां री मौजूदगी मांय आज बजट ने अन्तिम रूप दीनो। बजट भाषण रो आकाशवाणी जयपुर ऊं संवारे 10 बज र 57 मिनट ऊं सीधो प्रसारण कर्यो जावेला। राज्य रा बजट मांय कर्या जावण वाळा प्रावधानां री जाणकारी देवण सारु आकाशवाणी जयपुर ऊं खास बजट बुलेटिन प्रसारित कर्या जावेला। रोजीना दोपहरां पाछे 1 बज्यां हिन्दी मांय प्रसारित कर्यो जावण वाळो समाचार बुलेटिन काल 10 मिनट रा खास बजट बुलेटिन रा तौर ऊं प्रसारित कर्यो जावेला। इण रा ठीक पाछे राजस्थानी मांय खास बजट बुलेटिन प्रसारित कर्यो जावेला। बजट भाषण रे 1 बज्यां पाछे ई चालण री सूरत मांय खास बजट बुलेटिन बजट भाषण पूरो व्ह्यां पाछे प्रसारित कर्या जावेला। विधानसभा रा सत्र रे दौरान आकाशवाणी जयपुर ऊं सोमवार ऊं शुक्रवार ताई रात सवा आठ बज्यां **विधानसभा में आज** कार्यक्रम मांय सदन री दिनभर री कार्यवाही रो लेखो-जोखो पेश कर्यो जावेला। थावर ने रात सवा 8 बज्यां विधानसभा री कार्यवाही री साप्ताहिक समीक्षा प्रसारित करी जावेला।

000

प्रधानमंत्री नरेन्द्र मोदी कह्यो है के वां री सरकार भारत ने दुनिया री तीजी मोटी माली व्यवस्था बणावणो तय कीनो है। वे रूस रा दौरा रा तैत मॉस्को मांय भारत रा लोगां ने संबोधित कर रह्या हा। मोदी कह्यो के आज भारत तय करी ज्या लक्ष्य हासिल कर लेवे है। वे कह्यो के भारत दुनिया ने डिजिटल लेन-देन रो सब ऊं भरोसेमंद मॉडल मुहैया करा रह्यो है अर देश मांय सामाजिक हलका री बेहतरीन नीतियां ऊं जनता ने मजबूत बणा रह्यो है। प्रधानमंत्री कह्यो के भारत अर रूस दुनिया री बरकत मांय और तेजी लावण सारु मिल र काम कर रह्या है। वे कह्यो के जद भारत शांति, बातचीत अर कूटनीति री बात करे है तो दुनिया वां ने सुणे है।

000

राष्ट्रपति द्रौपदी मुर्मू विद्यार्थियां ऊं भणाई-लिखाई अर ज्ञान रो इस्तेमाल इंसानियत अर देश सारु करण बाबत् कह्यो है। वे आज ओडिशा री राजधानी भुवनेश्वर मांय एन.आई.एस.ई.आर. रा 13वां दीक्षांत समारोह मांय बोल रही ही। ई मौके राष्ट्रपति विद्यार्थियां ऊं आप-आप रा हलका मांय बेहतरीन काम करता थकां देश रो मान बधावण बाबत कह्यो।

राष्ट्रपति शिक्षा ने अमृत बरोबर बताता थकां कह्यो के भारत रा भौतिकविद सर सी. वी. रमन अर नामी खगोल विज्ञानी, गणितज्ञ अर विद्वान पटानी समंता सरीखा कदे ई नी भुलाया जा सकण वाळा लोगां ने आगे बधावण मांय भणाई-लिखाई रो घणो योगदार रह्यो। राष्ट्रपति विद्यार्थियां ने भणाई अर अनुसंधान रे दौरान विज्ञान अर तकनीक रो बेजा इस्तेमाल नी करण बाबत चेतायो।

000

राज्यपाल कलराज मिश्र कह्यो है के संविधान सगळां सारु सब ऊं ऊंचो है कां कि ओ म्हां ने न्यारा-न्यारा हक देवण सागे कर्तव्य पालन री सीख ई देवे है। राज्यपाल आज जयपुर मांय 'यूथ फॉर नेशन' संगठन री राजस्थान इकाई रा उद्घाटन जळसा मांय बोल रह्या हा। वे कह्यो के भारत नौजवान देश है अर नौजवानां ने देश री हिफाजत, राज अर कल्याण मांय पूरी भागीदारी करणी चाहिजे। राज्यपाल कह्यो के प्रदेश मांय ई संगठन री सरुआत ऊं नौजवानां ने बेहतर तरीका ऊं काम माथे लगा र वां री ताकत रो देश बणावण मांय इस्तेमाल कर्यो जावणो चाहिजे। ई मौके 'यूथ फॉर नेशन' रा अध्यक्ष पैली वाळा पुलिस

महानिदेशक डॉ.एस. पी. माथुर संगठन रा मकसद अर आवता बगत री कार्य योजना रा बारा मांय जाणकारी दीनी ।

000

वर्धमान महावीर खुला विश्वविद्यालय कोटा रो दीक्षांत समारोह काल राज्यपाल कलराज मिश्र री मौजूदगी मांय राख्यो जावेला । जळसा मांय जून 2021 अर दिसंबर 2021 मांय व्ह्या इम्तेहान मांय पास व्हेवण वाळा 39 हजार ऊं बत्ता विद्यार्थियां ने अर शोध करण वाळा ने उपाधियां दे र नवाजा जावेला । ई मौके न्यारा-न्यारा विषयां रा इम्तेहान मांय अब्बल रेहवण वाळा 73 विद्यार्थियां ने सोना रा तमगा अर दो विद्यार्थियां ने कुलाधिपति स्वर्ण पदक दे र नवाजा जावेला ।

000

राज्यपाल कलराज मिश्र आज जयपुर रा राजभवन मांय भारतीय पुलिस सेवा रा रिटायर्ड अहलकार मोहन लाल लाठर ने मुख्य सूचना आयुक्त ओहदा री शपथ दिरायी । राज्यपाल सुरेश चंद गुप्ता, महेंद्र कुमार पारख अर टीकाराम शर्मा ने राज्य रा सूचना आयुक्त ओहदा री शपथ ई दिरायी । ई मौके मुख्यमंत्री भजन लाल शर्मा, विधानसभा अध्यक्ष वासुदेव देवनानी, राज्य मंत्री मण्डल रा सदस्य अर कई आला अहलकार मौजूद हा ।

000

राज्य मांय ग्राहकां ने गैर वाजिब कारोबारी व्यवहार ऊं बचावण सारू उपभोक्ता मामलात विभाग री ओर ऊं जागरूकता अभियान चलायो जावेला । उपभोक्ता मामलात मंत्री सुमित गोदारा आ जाणकारी दीनी । वे आज जयपुर मांय उपभोक्ता मामलात विभाग अर भारतीय मानक ब्यूरो री ओर ऊं राखी ज्या राज्य स्तर रा प्रबोधन कार्यक्रम मांय वीडियो कांफ्रेंस रे जरिये बोल रह्या हा । मंत्री कह्यो के दुनिया रा उपभोक्ता बाजार मांय ई-कामर्स रा तेजी ऊं पसारा रे कारण नुवी चुनौतियाँ आई है । वे कह्यो के ग्राहकां रा हितां री हिफाजत सारू स्कूल-कॉलेजां अर प्रिंट, इलेक्ट्रॉनिक अर सोशल मीडिया रे जरिये प्रचार-प्रसार कर्यो जावेला ।

000

संसदीय कार्य, विधि अर न्याय मंत्री जोगाराम पटेल आज जोधपुर मांय जन सुणवाई कीनी । वे जनता री परेशानियां री ठा कर र अहलकारां ने तुरत आगी करण रा हुकम दीना । मंत्री कह्यो के जनता अर हलका री परेशानियां आगी करण सारू अहलकारां ने जनसेवा री भावना सागे काम करणो चाहिजे ।

000

प्रधानमंत्री सुरक्षित मातृत्व अभियान रा तैत आज चिकित्सा अर स्वास्थ्य विभाग री ओर ऊं अस्पतालां अर स्वास्थ्य केन्द्रां माथे आस वाळी महिलावां अर बच्चां रा स्वास्थ्य री जांच करी ज्यी । बत्ता जोखिम वाळी आस वाळी महिलावां री ठा कर र वां रो ईलाज करण सागे पोषण युक्त खाण पीण री जाणकारी दीरीजी । ध्यानजोग है के राज्य मांय हर महीना री 9, 18 अर 27 तारीख ने प्रधानमंत्री सुरक्षित मातृत्व अभियान रा तैत जांच करी जावे है । बूंदी मांय महिलावां रा बी.पी., वजन अर खून री जांच करी ज्यी । सवाईमाधोपुर जिला मांय स्वास्थ्य केन्द्रां अर आंगनबाडी केन्द्रां मांय आस वाळी महिलावां अर बच्चां रे टीका लगायी ज्या । जिला मांय आज शक्ति दिवस रा तैत शरीर मांय खून री कमी री रोकथाम सारू बच्चां ने दवाई पायी ज्यी । **जैसलमेर** रा सरकारी आयुर्वेद अस्पताल मांय पुष्य नक्षत्र तिथि रे मौके स्वर्णप्राशन शिविर लगायी ज्यो ।

000

प्रदेश रा आकांक्षी जिलां अर आशान्वित ब्लॉक्स मांय सम्पूर्णता अभियान रा तहत विकास ऊं जुड्या 6 मानका ने पूरी तरह हासिल करण सारू जोरदार कोशिशां करी जा रही है । कोटपूतली-बहरोड़ री जिला कलेक्टर कल्पना अग्रवाल जिला रा आशान्वित ब्लॉक नीमराणा मांय सम्पूर्णता अभियान रा तैत कर्या जा रह्या कामां री जाणकारी दीनी ।

000

मौसम विभाग आज अर काल प्रदेश रा लंकाऊ-ऊगणी हलकां मांय कठे-कठे भारी बारिश रा आसार जताया है । महकमा रे मुजब मॉनसून री ट्रफ लाइन राज्य रा लंकाऊ हलका ऊं व्हे र निकळ रही है । 11 जुलाई ने मॉनसून ट्रफ लाइन रे हिमालय ओडी जावण ऊं बारिश मांय कमी रा आसार है । ई दौरान भरतपुर संभाग मांय कठे-कठे भारी अर बाकी ठोड़ां हल्की ऊं मझला दर्जा री बिरखा री संभावना है । ई बीचे आज प्रदेश मांय न्यारी-न्यारी ठोड़ां बिरखा व्ही । जयपुर रा कुछ हलका मांय संवारे हल्की बिरखा व्ही । बाड़मेर मांय दोपहरां पाछे व्ह्या जोरदार मेह ऊं सड़का माथे पाणी भर ग्यो । भीलवाड़ा जिला मांय केई ठोड़ां बिरखा व्ही । उदयपुर मांय ई जोरदार मेह बरस्यो । पाली जिला रा रानी, जीवंदकला, सोमसर, बूसी अर देसूरी मांय सिंज्या री पोर चोखो मेह बरस्यो ।

000